

REGIONAL NEWS BULLETIN

HEADLINES (EVENING)

- 1. Vawiin Assembly rorel inkhawmah tun thla ni 4-a Finance department changtu, Chief Minister Pu Lalduhoma'n kum 2025-2026 budget a pharh tak chungchang sawiho a ni.
- 2. Chief Minister Pu Lalduhomn budget thar tur chu cheng vbc 786.62-in a pung dawn a, a punna chu za zelah 5.45 a ni a ti.
- 3. Union Home Minister Amit Shah-a chuan hmarchhak zirlaite tan an awmna chhuahsana hna zawn a ngai dawn lo tih a sawi.
- 4. Prime Minister Narendra Modia chuan tukin khan ni hnih cham turin Mauritius a thleng.



BUDGET DISCUSSION

Vawiin Assembly rorel inkhawmah tun thla ni 4-a Finance department changtu, Chief Minister Pu Lalduhoma'n kum 2025-2026 budget a pharh tak chungchang sawiho a ni.

Eptu hrulaitu, Pu Lalchhandama Ralte chuan ZPM kaihhruai sorkar chuan financial kum kal lai 2024-25-ah sum dinhmun siamthat tumin sum inrenchem leh insawhngheh kumah puangin a loh theih lovah lo chuan sum a hman lova, leiba te chu tlahniam viaua, sum dinhmun chu tho kang turah ngaih a nih laiin vawiina Actual an hmuhah chuan kum kalta 2023-24 aiin kum 2024-25-a leiba zat tur ni awm a lang chu cheng vbc 948.5 in a pung zawk a, ZPM kaihhruai sorkar chu sum enkawl thiam tak niin a hmu lo tih a sawi a. Hei bakah hian Finance Minister-in budget estimate a siamah Revised Estimate a awm tawh chung a 2024-25 BE leh 2025-2026 BE a khaikhin chu lan mawi tumna, Zoram mipui bum tumna ni-a a ngaih thu a sawi a ni. ZPM kaihhruai sorkar chu MNF sorkar laia SEDP an hman ban cheng vbc 110 an hmanna a zawt bawk a. Mizoram sorkar chuan Revenue Deficit a neih khat hle laiin, kuminah an nei tlat chu ZPM sorkar sum hmanna a felfai lo hlea a hriat thu a sawi a ni. Kumin Education budget nuai sing 3 zeta tlahniam chu pawl a tih thu sawiin, duhsak thei hram se a duh thu a sawi bawk a ni.

Congress MLA awmchhun, Lawngtlai West bialtu, Pu C.Ngunlianchunga chuan kumin Budget chu budget tha ni-a a hriat loh thu leh member te pawhin budget sawi an phur lo hle-a a hriat thu a sawi a, kumina Mizoram budget cheng vbc sing 1, sang 5, 198.76 chu manganthlak a tih thu sawiin, ZPM kaihhruai sorkar thar Revenue expenditure chu za zelah 83 ang vel niin, capital expenditure-ah za zelah 17 a ni a, chuta tang chuan leiba rulhna tur engemawzat a awm a, hmasawna hnathawhna atana an hman tur chu cheng

vbc sang 1, 900 ang vel bawr a ni tih sawiin, Minister leh MLA te tan pawh a chhenfakawm loh hle a, an bial mi leh sa te tih lawmna tur pawh a awm lova, budget chu ram hnuk tak tak khawih siamna tur niin a lang lo a ti.

Pu Ngunlianchung a chuan sorkarin mipuite rawng a bawlsakna tur ber, social services allocation tlahniam chu lawmawm lo a tih thu leh anmahni thlang tlingtu mipuite ngaihthahna lian takah a ngai tih a sawi a, ZPM kaihhruai sorkar chuan Revenue expenditure ti kiam zawngin hma a la lo tih sawiin, inrenchem kumah puang mahse an pawisa puk zat a sang telh telh a, year of consolidation an puan chu a tak taka hmalakna ni lovin auhla mai niin a puh bawk a ni.

BJP MLA, Siaha bialtu, Dr. K. Beichhua chuan nikuma Finance Minister-in year of consolidation a puan avanga sorkar leiba tam tak rulh a ni leh kumin 2024-25 Revised Estimate-a Mizoram leiba cheng vbc sang 1,03.94 zeta a tlahniam chu lawmawm a tih thu sawiin, public account hnuaia sorkar sum pekchhuah hmabak, K-Deposit sum tlingkhawm, GPF leh Pension benefit pek chhuah a nih theih nan leh sum inrelbawl na tha Mizoramin a neih theih nana Finance Minister-in theitawp a chhuah ni-a a lan thu leh thlamuanthlak a tih thu a sawi a ni.

Hetihlai hian Mizoramin a tangkaipui em em, central scheme a tlahniam tih a sawi a, helama insawrbinga tan lak tul a tih thu a sawi a, kum 2025-2026 budget-a Motor vehicle atanga chhiah hmuh an inbeisei chu 2024-25 RE nen a inang tih sawiin, lirthei a pun nasat zia enin mak a tih thu a sawi a, Health & Family Welfare-ah 2024-25 RE chu tuna BE-in a pha lo nasa tih sawiin, damdawilama inenkawl na leh hriselna kawnga hmalak lamah kut an inkuangkua deuh hlek tih zawhna a zawt a, helamah hian hmasawn a nih theih nan insawrbing deuh pawimawh a tih thu a sawi a, Economic Service Capital account disbursement-ah RE chu BE-in an phak loh em avangin thil liantham tih an tum lo ang a tih thu a sawi bawk a ni.

Pu Beichhua chuan ZPM Flagship programme, Hand holding-a cheng vbc 350 chauh dah a ni leh thlai thar leina tur lang miah lo chu kuthnathawktute tan thlamuanthlak loh a tih thu a sawi a bawk a ni.

<><><>

CM

House Leader, Chief Minister Pu Lalduhoman budget thar tur chu cheng vbc 786.62-in a pung dawn a, a punna chu za zelah 5.45 a ni tih a sawi.

Wawiin sessiona budget chungchang sawihonaah Pu Lalduhoma chuan, thil thar langsar zual ber, GSDP final figure chu hriat a tlai thin avangin an estimate fuh leh fuh loh a hriat theih lova, Mizoram sorkar hmasa te chuan GSDP chu a tam thei ang berin an sawi thin a, an hisap chhin leh a tak tak chu vbc sing bi in a in tam hleih thin tih a sawi a, chu chu mipui bumna anih avangin a kaihhruai ZPM chuan tehna chi hrang hrangah an leibat zat tisang dawnin lang mahse chhiarkawp dik tak an puang thei chu an lawm hle tih a sawi a, kumin BE chu chhiarkawp awmsa ringin an siamtha hman lova, RE chu an siamtha hman a, Mizoram GSDP chu vbc sing 1, sang 4. 25 in a hniam ta dawrh tih a sawi a, tuna a dika an tih avang hian kumthar ah chuan a thang chho tawh dawn tih a sawi a ni.

Pu Lalduhoma chuan kumin April ni 1 atangin sorkar damdawiinah te cashless in an kal tawh dawn a, sorkar damdawi in zawng zawng an upgrade dawn a, doctor an mamawh a nih chuan an mamawh zat an lak belh dawn a ti.

Chief Minister chuan a kaihhruai ZPM sorkar chuan Mizoram tan theihtawp an chhuah a, an hmalakna reng reng chu sorkar insiamremna chauh nilovin mipuiten kawng dik an zawh theihna tur, moral reform a nih thu a sawi a, sem a awm ve tawh lo chu lawmawm an tih thu sawiin, mipui sorkar a pian tawh avangin bana kaih chu a taima apiangte tan a inhawng tih a sawi a, anmahniah rinna nghata thlang tlingtu Zoram mipuite tihbeidawn an tum lo tih a sawi ni.

<><><>

EXCISE MINISTER

Excise and Narcotics Minister Pu Lalnghinglova Hmar chuan Mizorama zu hlauhawm nia sawite mihring tana a hlauhawm zia chipchiar taka pholang turin Delhi-a Central Laboratory-ah endik tura hmalak mek a nih thu House a hrilh.

Vawiina Assembly sessiona zawhna leh chhanna hunah Excise Minister chuan Champhai South bialtu, Lt. Col. Clement Lalhmingthanga zawhna chhangin, Aizawl chhehvela zu hmunpui ni-a sawi, Rangyamual, Phunchawng leh Tuikhurhlu-a zu te chu dan phal lohva siam leh zawrh vek a nih thu leh heng zu siam leh zuar te bakah a in te chu dan tlawhchhana man zel an ni a ti a, kumin January ni 20 khan Mizoram Police te nen joint operation neiin mi 150 lai man an ni tih sawiin zu siamna hmun 101 lai tichhia in rakzu litre 1083, zu bilhlai tin 25,556 leh zu bilhna bel lian 96 tihchhiat a ni a ti a, Mizorama zu siamchhuah te chu nunna atan a hlauhawm bik ni-a sawi a awm avangin zu sample chu New Delhi-ah zirchian mek a ni a, result a la chhuak lo tih a sawi bawk.

Excise Minister chuan Assam Rifles nen an thawh hona a tha hle tih sawiin Champhai leh Saitual District chu ruihhlo kalkawng a ni tawh a ti a, ruihhlo lut a tam em avangin an in veng senglo tih a sawi. Minister chuan a senchi lane ti-a sawi, Vaivakawn, Zohnuai pheia zu zawrh titawp turin nikum June thla khan Excise department chu Vaivakawn khawtlang nen tangrualin theihtawp an chhuah hnuah a ziaawm tawh hle a ti a, hetihruai hian a aia hla zawk Rangyamual leh Phunchhawng lamah zu chhe zawk chu thalaiten an in zel tho avangin he thila hmalak dan tur chu ngun taka ngaihtuah ho a ngaih thu sawiin khawpui laili leh hmun pawimawh laia ruihhlo hluar tur chu a theih chin chin an ven thu a sawi a, thalai ruihhlo ngaite hmachhawn dan kawngah ngaihtuahna sen nasat a ngaih thu a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan tukin khan ni hnih cham turin Mauritius a thleng a. Airport-ah Mauritius Prime Minister Navinchandra Ramgoolam chuan a lo dawngsawng a ni. Social Media-ah PM Modia chuan

Prime Minister lo dawnsawn danah lawmthu a sawi a. President Dharam Gokhool leh PM Navinchandra Ramgoolam te a kawm tur thu sawiin vantlang inkhawmah thu a sawi dawn tih a tarlang bawk a ni.

Pu Modia chuan Mauritius-a India mi chengten an lo lawm dan chu lawmawm a tih thu a sawi a. Indian mite leh Mauritius te hian inzawmna nget tak an neih thu a sawi bawk a ni.

Prime Minister Narendra Modia chuan vawiin vek khan Mauritius President hlui Sir Anerood Jugnauth leh Prime Minister hlui Sir Seewoosagur Ramgoolam te thlan tlawhin pangpar a dah ani.

Naktukah Prime Minister Modia hian Mauritius National Day-ah khuallian niin a hmanpui dawn a. Kum 1968-a British awpna hnuai atanga an zalenna ni March ni 12 hi kumtin Mauritius Natioal Day atan hman thin a ni.

PM Modia chuan a zinchhuah dawna thuchhuah a siamah Mauritius thliarkar chu thenawm ram pawimawh tak anih thu sawiin Indian Ocean-a India thawhpui tangkai tak a ni tih a sawi a. Africa khawmualpui tlawhpawhna chhuahka pawimawh tak anih thu a sawi bawk a ni.

<><><>

UNION HM

Union Home Minister Amit Shah-a chuan hmarchhak zirlaite chuan an awmna chhuahsana hna zawn an ngai dawn lo tih a sawi. Vawiina hmarchhak zirlaite tana Students' Experience In Inter-State Living (SEIL) ten Youth Parliament an buatsaihah he thu hi sawiin Pu Shaha chuan hmarchhak zirlaite chuan zir zawh hunah an awmna hmunah hna in a rawn zawn zawk dawn a ti a. Ramchhunga rel leh kawng project lian ber Brahmaputra-ah ruahman mek anih thu a sawi a. Assam leh Bhutan inkarah rel kawng siam mek a nih thu a sawi bawk a. Union Home Minister chuan BJP sawrkar hnuaiah Sikkim ah organic agriculture kalpui anih thu a sawi bawk a ni.

<><><>